

## M238: Die Wahrheit

0,1     Nv wil ich bitten den got .  
0,2     der von den iuden wart gemarterot .  
0,3     daz er mir uerlihe den sin .  
0,4     daz ich muozze chundin .  
0,5     den armen under den richen .  
0,6     di chunft fraisliche .  
0,7     den iungen ioh den alten .  
0,8     was uns ist behalten .  
0,9     wa wir uns sulen enden .  
0,10    wir sin in dem ellende .  
0,11    unser heimot ist uns ungewis .  
0,12    dar in helfe uns der heilige christ .  
0,13    Daz himelrich ist unser heimot .  
0,14    div helle ist der ewige tot .  
0,15    div genade ist daz paradisus .  
0,16    dar werdent alle di gewiset .  
0,17    die daz umbe got uerdienent .  
0,18    di anderen  
0,19    uil ureisliche cherint .  
0,20    in daz tieffe hellewize .  
0,21    da sulen si wesen inne .  
0,22    mit uil micheler grime .  
0,23    beidiv naht unde tach .  
0,24    als der tieuיל uil wol geleistin mach .  
0,25    immer an ente .  
0,26    daz ist daz ellente .  
0,27    Des bewart ivch mine uil liebe .  
0,28    i ne wiL iv niht liegen .  
0,29    iz gehite also werde .  
0,30    der himel zu der erde .  
0,31    die gewnnen ensamet ein kint .  
0,32    des alliv disiv lant sint .  
0,33    einen uil heiligen sun .  
0,34    der lost uns uon der helle gru-t .  
0,35    mit sinen fiivnf wnden .  
0,36    virtilget er unser sunt .  
0,37    er gab uns bediv  
0,38    libes . unde leides .

0,39 ubeles unde guotes .  
0,40 swederes uns wrde ze muote .  
0,41 ovch hat er uns gehaeizzen .  
0,42 daz wil er war lazzen .  
0,43 gevalle wir wider an den tot .  
0,44 er ne werde nimmer  
0,45 mer durich uns gemarterot . Nv muget ir waenen daz ich tobe .  
0,46 wande ich iv daz leit lobe .  
0,47 swer so lieb leidet  
0,48 leider ungerne er danne scheidet .  
0,49 also mach mir sin .  
0,50 ich lobe iv unseren trehtin .  
0,51 unde leide iv den dievel .  
0,52 er ist ane zviuel .  
0,53 ein rehter lugener  
0,54 lat in iv sin ummere .  
0,55 ich sage ev daz ze ware .  
0,56 wolt ir noch zu ime keren .  
0,57 vnde ervolt ir sinen willen .  
0,58 er frum& ivch in die helle .  
0,59 Des warne ich ivch minnichliche .  
0,60 daz gebivtet mir christ der riche .  
0,61 vnde ladet ivch wider ze lande .  
0,62 nemit bilde bi dem walde .  
0,63 er ist uil schone unde uil breit .  
0,64 ir sit iwers mvotes uil gemeit .  
0,65 er ne ist idoch nie so lanch noch so groz .  
0,66 er mvoze ze ivngeste siner tolden werden bloz .  
0,67 er wirt ane wrzen vnde ane saf .  
0,68 des gehuget wol die wil ir habet iwer chraft .  
0,69 vart ir ze der helle daz ist mir leit .  
0,70 swer dumben herfet der fluset sin arebeit .  
0,71 swer so winchet dem plinten .  
0,72 der uerlivset sine stunde .  
0,73 behvotet iuch in disen churcen citen .  
0,74 ir muget lihte ze lange biten .  
0,75 bitet ir so lange  
0,76 unze ir mit dem grimmen tode werdet bevangen .  
0,77 so ir ez denne uil gerne taetet  
0,78 so sit ir ze spete .  
0,79 Waz mach ir reden mere .  
0,80 ne welt ir ivch niht becheren .  
0,81 so wirt uil lihte .  
0,82 daz ir mit al gerihte  
0,83 des grimmen todes mvozzet bechoren .  
0,84 so sit ir immer mere v'loren .  
0,85 an der armen sele .  
0,86 geswichet ir dem herren .

0,87 der ivch mit sinem bluote chvofte .  
0,88 vn- iv di missetat ab flovte .  
0,89 in dem iordane .  
0,90 wrde wir ze ware .  
0,91 alle frige gezalt .  
0,92 er holte uns ovz der helle mit sinem gewalt .  
0,93 das bedench wir uil liebe in dem sinne .  
0,94 iz en getet nie dehein chint .  
0,95 durich sines vaters willen .  
0,96 daz ez sich lieze chollen .  
0,97 noch der vater durich sinen sun .  
0,98 nu lonet im mit triwen .  
0,99 noch wirt ein tach  
0,100 daz iz uns wol gefrumen mach .  
0,101 hab wir im iht gedienot .  
0,102 des wirt vns gelonot .  
0,103 Wir sin fraeisliche wnt .  
0,104 wir sulen wider sa zestunt .  
0,105 gahen uil harte .  
0,106 zv unserem ewart .  
0,107 unser sunde sul wir in lazen sehen .  
0,108 unser grozer sunde v'gehen .  
0,109 er uindet uns die stralen .  
0,110 da wir mit gescozen waren .  
0,111 belibet si dar inne  
0,112 so wir die wnden gewinen .  
0,113 so ne chan si nimmer enhaein man .  
0,114 mit sinen sinnen gehailen .  
0,115 so mvoze wir siechen immer me .  
0,116 daz muge wir bewaren allez . e .  
0,117 von div bite wir uns an den buochen .  
0,118 die arzat suochen .  
0,119 div getranch ovch die binden .  
0,120 wie gereit wir got danne uinden .  
0,121 so hailet er uns min uil lieben .  
0,122 so muge wir den ewgen lib uerdienen .  
0,123 Der ewige lip der ist so getan .  
0,124 da ne mach daz wip noch den man .  
0,125 gehung'en noch gedursten .  
0,126 geiameren noch gevriesin .  
0,127 uil wol sint si behutet .  
0,128 vor alr slaht noten .  
0,129 engelin sin si anelich .  
0,130 immer unsuntlich .  
0,131 mit allen genaden sint si behuot .  
0,132 zi himele ker wir noch unseren mvot .  
0,133 nach unser aller heile .  
0,134 vnde erwerin uns der helle . vor dem urteile .

0,135 Nu furhte ich eines ualles .  
0,136 uber uns sunter alle .  
0,137 der schuldege der scamt sich .  
0,138 idoch  
0,139 sol sich nehein man .  
0,140 ze harte missetrosten .  
0,141 wil er sin haben rat .  
0,142 er uindet einen arzat .  
0,143 der im heilit sine wnden .  
0,144 vn- in machet wol gesunden .  
0,145 div buoch sagent uns fur war .  
0,146 daz niemens sunde sin so swaere .  
0,147 wil er sich lazen riwen .  
0,148 mit inerclichen triwen .  
0,149 got der ist so genedich  
0,150 er v'lihet im den ewigen lip .  
0,151 Daz liet heizet div warheit .  
0,152 daz ist de- tieuel so leit .  
0,153 swa er daz horet singen od' sagen .  
0,154 oder dehein rede uone gote haben .  
0,155 war tuo wir arme unsern sin .  
0,156 ia gesuof uns min traecht in .  
0,157 war dench wir vil lieben .  
0,158 daz er uns alle tage dienet .  
0,159 mit weter ioch mit wint .  
0,160 als der vater sine- kinde .  
0,161 wolt wir im s getriwen .  
0,162 er gebuozt uns unser rewen .  
0,163 un- gebe uns daz taegeliche brot .  
0,164 un- gebuzte uns alle unser not .  
0,165 ia dienet uns alles daz dir ist .  
0,166 ligendez un- lebendez .  
0,167 div maenin ioch d' sune .  
0,168 di livcten uns mit wnnen .  
0,169 der tach hvmt uns als iz got gebot .  
0,170 sich frovt der mensch daz er ist gesunt .  
0,171 Ich waen ez ie wart .  
0,172 sit daz adam erstarp .  
0,173 daz also manech wip vn- man .  
0,174 wid' got haben getan .  
0,175 an ir sebes liebe .  
0,176 des sulen si di not leiden .  
0,177 an ir gewant un- an ir hare .  
0,178 vnde an ir geschuode ze ware .  
0,179 daz tunchet mich vbele getan .  
0,180 des rates wil ich abe gan .  
0,181 vil michel iamer mvoz mich han .  
0,182 daz also maneger mvoter barn .

0,183 in die helle sol varn .